

**Viis kanapessä
ütstõõsõ otsan**


Kae lk 2

**Võromaa kihlkunna:
Kanepi**

Kae lk 3

**Kuis präska pulli
kasuma pand'**

Kae lk 4



Paidran käüti läbi mõtsavele matkarada

Joba neli aastakka tähüstäs Lasva valla Paidra külä rahvas Eesti vahtsõst esisaisvas saamisõ päivä, 20. põimukuu, esimuudu: tuul pääväl käädas läbi ja puhastõdas är mõtsavele matkarada.

Tuu matkarada om tsipa rassõmb, ku hariligu raa, läbi tulõ minnä ka Võhandu jõost ja turni korgidõ pervi pääl.

Timahava olf matkaraa läbi-käüjit kül tsipa veidemb ku innemb om olnu, õnnõ 8 inemist.

Mõtsavele matkarada om tettü Paidra külä kõgõ kuul-samba mõtsavele Sabbe Augusti avvus, kiä olf mõtsan nika ku 1978. aastani.

Tulõva aasta saa 100 aastakka Sabbe sünnüst, sis proovitas raa läbikäümist suurõmbalt ette võtta, kõnõl Umälõ Lehele Paidra küläseltsingu vidäjä Riitsaarõ Laine.

UL

Teküs rahvapillilaagri

Minevä nädäli peeti Varstun Võromaa rahvapilli- ja laululaagrit, viic pääväga oppõ laagrilidsõ är päält 70 pilliluu.

«Seo olf kõgõ ägedämb laagri, mis meil om olnu,» selet laagri kõrraldaja Laube Kadri. Midä sis laagrin tetti: lindistedi 70 luuga «laagriplaat», tetti ütine kontsõrt, 20 kannõldajat tei Kanni Tuule iistvidämisel kandlõkooi, Sarvõ Henn tutvust hindä okariino-koko (savipardsi-muudu vilespill).

Viil olf rütmitunni, sai kullõl-

da kolmõ ungarlasõ kontsõrti ja oppi ungarl tandsõ, külälaine Norrast tutvust skandinaavia muusikat. Edimädsel õdagul küdseti ütidselt maa-ahun lammast.

Laagrihe tulf 43 opilast mitmõst Eesti nukast, poolõ olf Võromaalt. Kõgõ inämb olf 14–17aastidsi, a ka suuri inemiisi, eski kats 50 aastin Lembitut, kiä hafodi lõõdsä- ja akordionimängu. Laagri lõpun anti Varstu rahvalõ kontsõrt.

UL

Raamadupäiv Kanepin

HARJU ÜLLE
ylle@umaleht.ee

Tuust, et Kanepi taht raamaduküläs saia, om innembki juttu olnu. Edimäne suur samm om tett: pühapäivä sai Kanepin nätä hulka kirärahvast ja raamadukaupmiihi, peeti edimäne raamadupäiv.

Raamadupäiväl olf hulga ülesastjit. Ummi laulõ ja luulõtuisi loiva ette Contra, Ehini Andres, Kaplinski Jaan, Kauksi Ülle, Merca, Ilvesse Aapo, Rahmani Jan ja Ruitlasõ Olavi.

Anti vällä ka avvuhind «Kanepine hame», miä mõtõld 10 aastakka tagasi välläantu raamatulõ, kon om juttu Lõunõ-Eesti asjust ja miä viil täämbädsel päiväl tähtsä raamat om. Avvuhinna sai Kauksi Ülle uma romaani «Paat» iist.

Päält raamadulaadu ja kirärange esinemiisi tetti valla



HARJU ÜLLE PILT

Raamadupäivä üts kõrraldaja, kunstnik Margna Epp (hääd kätt) raamadulaadu pääl.

kunstigalerii, käüti kacman Kanepi kultuuriluuga kõüdetüisi paiku ja peeti maaha väiku oksjon.

Raamadupäivä tegemiisi man olf külälise Soomõst Sysmä raamaduküläst. Nimä andva Kanepi rahvalõ hääd

nõvvu, kuis raamadukülälä toimõndamiisiga edesi minnä. Oodami ja kaemi, miä saa edesi.

Ökofestivalilt löüd egäüts uma

19.–23. põimukuu peeti kolmandat Põlva ökofestivali. A joba tõist aastakka olf oppusõ ja käümise Põlva liinast peris kavvõ – festivali projektijuht Laanemaa Kai ütël, et tuud tetäs selle, et kaema tulnu ka inämb paigapäälitsit inemiisi. Ökofestivalil käve timahava 4000 inemise ümbre. «Oppuisi ja käüke vasta olf väega suur huvi, kahõs pidimi pallõdõlõ är ütlemä,» kõnõl Laanemaa Kai. Kõgõ inämb himostõdi minnä Turovski Alekseiga matkalõ. Laanemaa Kai esi jäi kõgõ inämb rahulõ festivali lõpõtamisõ paiga – Karilatsiga. «Järgmädsä aasta põhipaik om Rāpinä,» ütël tä ette. Tä luut, et sis saa inämb nätä ka tuu kandi luudusõ-huviliidsi.

PEEDOSAARÕ KAISA

Pallõdõ põnõvidõ oppuisi ja tegemiisi siäst valisi ma kaemisõ käsitüükursusõ Pokumaal ja sõidu nellä ökotallo.

Ku ma 19. põimukuu keskpäiväl Pokukua ussõst sisse asti, sis tei oppusõlõ tulnu inemise parajalõ vildist ubinit. Nobõhidõ näppõ kesken saisõ Mamastõ käsitüümeistri Kalle Maaja (58).

Tulf vällä, et Maaja om sääne meistri, kiä võtt kõiki ummi tegemiisi hingega. «Inemine piät algusõst lõpuni uma asa tegemise man olõma. Ei saa nii, et tulõt koskilt poolõ päält ja nakkat puulfabriikaadi päälte tegemä. Sis kaos tuu õigõ asa mõtõ är. Tähtsä om tuu, et tunnõt iks innemb matõrjaali ja sis nakkat säält ummi kässiga midägi tegemä. Nii saa toolõ asälõ iks su hing kah sisse,» sellet tä umma nägemist käsitüü tegemisest.

Maaja mõist tetä väega mitund sorti käsitüüd. A Pokumaal kävven jäi külh silmä, et timä leevänumbri om iks viltmine: neo asa, mis täl ütine olf võedu, olf nii ilosa, et mõista-i tuud kuigi sõnnoga kirja panda.



PEEDOSAARÕ KAISA PILDI
«Mis mõro, tuu hää!» opäs Kutkina Liisi ravihaino pruukma.

Kalle Maajal olf hää miil, et timahavadsõl kursusõl nii hulga käsitüühuviliidsi olf. Timä sõnno perrä tasos inemiisil külh käsitüü tegemist oppi, ku om õnnõ tahtmist taad asja tetä.

Määnest käsitüüd tasos tetä, midä inemise ostassi? «Ku midägi tiit, sis kac ja mõtlõ, et kas sa esi säänest asja ostassi. Ku tiit midägi säänest, midä

tahat tetä, sis saa asälõ uma nägo päähä ja ost- ja tahtva kah säämeiga tettüt asja,» arvas Kalle Maaja. «Tuuperäst ei tii ma kah massoodangut: asju hing ja ilo kaosõ sis är.»

Mahhetalon võisi hinnäst hääst kraamist lahki süvä

20. põimukuu sai kävvü ökotallõ-tuuri pääl nelän talon, kon kasvatõdas söögikraami ilma kihvti ja kunstväetüseldä. Reisijuhtõs olf Kauksi küläst peri Põlvamaa arõnduskeskusõ nõvvoandja Marrani Tiiu ja Sulaoja küläst peri ökoloogiliste tehnoloogiate keskusõ juht Miku Merit (timä tiid mahhetallõ kotsilõ nii hulga kõnõlda, et peris hirm nakkas!).

Sai selges, et egäsugudsõ mahhekraami kasvataminõ om iks kallimb ja saak väikumb ku sis, ku kihvtiga pritsi. A tuu tsipa kallimba mahhemafakarbi kotsilõ ütël mahhemarju kasvataja Pendi Raimond, Punni talo peremiis Leevi kandist

Varõssilt: «Innemb jätku esä tugituul vai arvutõ vahtsõnõ jupp ostmalda, ku et latsõlõ mahhemara.»

Oraperä talon kaimi, määndsit maigu- ja ravihaino kasvatas pernaanõ Kutkina Liisi. Mõni näist olf peris mõro maiguga. A näütüses koiroho kõtuparandamisõ kotsilõ ütël pernaanõ niimuudu: «Mis mõro, tuu hää!»

Kerdohani (Kerdohänni) talo Kanepi kandin Soodomal kasvatas mahhet terävillä. Näil om ka suur uibuaid, kon mi, bussirahvas, hinnäst ribadõs seimi. Mõnikümmend lihaeläjät om talon kah, a neo eläjä ei olõ viil mahhe-eläjis tunnistõdu.

Kaagri (Kaagverc) külä Sepä talo pernaanõ Demitõeva Eve pidä lambit, kitsi, küülikit ja kallo. Seon talon tett kitsõ-



Noidõ kitsi piimäst tetäs Sepä talon säänest juustu, miä vii ahnõmbil keele ala.

piimājuust olõs pia keele alla veenü.

Ökotallõ tuuri pääl tulnu inemise olf pia kõik sändse, kiä tahtõs tuud asja nätä ja perrän esi perrä tetä. Talopidäjide käest küsti väetüse pandmisõ

kotsilõ ja kuis hainaga toimõ tulla. Miku Merit sooviv mahhekraami kasvatajil rohkõmb turu otõmsõga tegeldä ja mitte õnnõ sõpru-tutvidõ päälte luuta. Turu otõsmalda jätmine om mahhetalõ ütõ päämiidsi häti.



Riidi käve vana Võromaa mutukil, eläjil ja inemiisil küläh kuulsa zooloog Turovski Alekseil. Ökofestivali kutsut luudusõmiis tekü huviliidsiga Meenikunnuh, Süvähaval, Ilumõtõsah ja Piusal paar tsiiro.

Kõgõ kavvõmbalt olf kuulsa luudusõtiidjaga kokko saama tulnu seo liblik. Tedä kutsutas Admiralis ja nukust om tä vällä roninu Itaaliah.

Nigu nätä, om üle Alpõ ja Euruupa lindaminõ ja tuuli pääl mäsoaminõ libligu tsiiva veedükse namõndama võtnu. Jo sõs tasos Turovskiga kokkosaaminõ seo vaiva är. Inemise saiva külh mutukidõ-eläjide ja kasvõ kotsilõ kõvva targõmbas. Väega huvitav olf, viil tahas!

ILVESSE AAPO jutt ja pilt

